

AKASHVANI AIZAWL

REGIONAL NEWS BULLETIN

Sunday, July 13, 2025 Time - 2:30pm - 2:35pm

FOOD PROCESSING

Mizoram Food Processing Research and Training Centre (MFPRTC) Incubation Centre, Phaibawk, Seling a 'Basic Food Processing Course for Tuikum Constituency Batch' 74 - na tana training course chu Agriculture Minister Pu PC Vanlalruata'n nimin khan a khar.

He training hi Mizoram Food Processing Research Training Centre in an huaihawt a. Pickle, Juice, Jam, Powder, Powder, Chips siam ante bakah , a vawnthat dan leh Food safety chungchang zirtir an nia , Thentlang, Chhingchhip, Chhiahtlang, Baktawng leh Hmuntha khua atangin hmeichhia 20 training ah hian an tel a ni.

Minister chuan eitur sawngbawl kawngah Mizote an thang harh mek zel chu lawmawm a tih thu a sawi a. Thiam loh leh la hriat ngai loh zir chhuah chu kawng hrang hrangah a tangkai a, training paltlang hian hlawkna engemaw tal zir chuah a nih thin avangin training chi hrang hrang uar zel a pawimawh a ni a ti.

Ei leh in sawngbawl danah Mizote fing chho zelin ei tur thianghlim taka sawngbawl dan leh dah that danah hmasawna a awm zel a ni a ti a. Mihringte hian engemaw thiam bikna 'skill' a neih loh a, talent dawn a tih pun loh chuan a nih tur ang a ni phak lo thin a, a hlu tawk thei lo thin nia sawiin, ropui taka bul tan kher a ngai lo, a bulanna chu eng pawh ni se la, teirei peih leh thawhrinna a pawimawh a ni, a ti.



ZORAMTHANGA

Wawiin hi chief minister hlui leh MNF party president ni bawk Pu Zoramthanga piancham a ni a, wawiin hian kum 81 a tling a ni.

Larsap Gen. Vijay Kumar Singh chuan Pu Zoramthanga hi social media kaltlangin piancham chibai buk sin, duhsakna a hlan a. A hriselna lo tha zel a lo hlim zel tura a duhsak bakah a thiamna, finna leh chakna kum tam tak hmang tangkai zel tura a duh thu a tarlang bawk a ni.

Pu Zoramthanga hi kum 1944 July ni 13 khan Champhai district a Samthang khua-ah a piang a, a pa chu Darphunga niin a nu chu Vanhnuai chhing a ni. DM College Imphal a BA (English honours) a zir lain MNF a zawm a, ramhnuai-ah a lut a. Sorkar laipui leh MNF inbiakna-ah a kul a tai ah tangin , an president Pu Laldenga a zui hnu-ah kum 1986 a sorkar leh MNF-in inremna an ziah hnu khan ramhnuai atangin a lo chhuak a. MNF leh Congress-in sorkar intawm an dinah minister a ni a. Kum 1987 khan state sorkar hmasa berah minister ni zui leh in Pu Laldenga thih hnuah MNF president atan thlan tlin a ni a, he dinmun hi tun thlengin a la chelh a ni.

Kum 1998 khan MNF leh MPC tangrualin sorkarna siamin chief minister atan lakluh a ni a. Kum 2003 inthlan khan sorkarna siam zui lehin chief minister a ni zui a. Kum 2018 khan MNF-in hnehna chang lehin a vawi thumna atan chief minister atan lakluh leh a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



LAND RESOURCES

Rural Development & Administration Department Minister Prof. Lalnilawma leh Bhartiya Samruddhi Investments and Consulting Services Limited (Basics Ltd), Hyderabad Team-te chuan leilung hausakna humhalh chungang thingtlanga eizawna ngelnghet siam tura thawhho dan tur an sawiho.

Zirtawpni a he hun hmanna-ah hian Additional Secretary Pu V. Lalengmawia, Director Pu Lalrohluah, CEO MzSRLM Pi Zosangzuali Pachuau, leh RD&A Department-a thawkte an tel a. RD&A Minister chuan Mizoram chu leilung hausakna, ram ngaw, boruak thianghlim leh lui engemaw zah luanna a nih rualin, hmasawna ken tel mihring khawsak than zelna avangin leilung hausaknate uluk taka humhalh a tul thu a sawi a. Thingtlang lama eizawna, ei leh bar atana hmalaknate hian ram leilung hausakna a khawih chhiat lohna turin ruahmanna kalpui a tul thu a sawi. Thingtlang lamah hmasawna inbuk tawk kalpui a pawimawh thu te, ram leilung hausakna tichereu lova thingtlang mi te tan eizawna ngelnghet siam dan tur te, Mizoram chhunga lui lian leh a fintu lui te te humhalh a pawimawh thu te, lui hnar leh lui kam a khawsa te tan tuihna tichhe lo zawnga eizawna ruahman sak dan turte he thutkhawm ah hian sawi ho a ni.

Thutkhawmah hian RD&A leh NEIDA tangkawpin Project Tuihna – Damkhawchhuahna kalpui meknaah Watershed Development Component of Pradhan Mantri Krishi Sinchayee Yojana 2.0 (WDC-PMKSY) hnuaiyah tuihna 1465 chhinchhiah atangin 982 chu humhalh tawh a ni a. WDC-PMKSY 3.0 hnuaiyah 8099 humhalh tura hmalak leh mek a nih thu tarlan a ni.



DETONATORS, METH

Assam Rifles in tun hnai khan bomb tihpuahna kep (detonator) leh methamphetamine tam tak an man.

Assam Rifles thuchhuahin a tarlan danin Aizawl Chanmari vengah bomb kep 7,000 an man a, hemi kaihnawihah hian mi pakhat an man a, a hming erawh chu an puangzar lova, a mantute hi Assam Rifles leh Aizawl Police Station amite an ni a, Inrinni zing lam a ni mah mah a. An mirinhlelh chenna in hi an enthlak hnu a , an

finfiah a, an luh chilh a, bomb kep hi an man ta a ni. An thil man leh a neitu a puh hi Aizawl Police Station-ah hlan a ni a, he thil hi chhui zui mek zel a ni.

Hei bakah hian Zirtawpni zan khan Zokhawtharah Assam Rifles in an mi rinhlelh pahnih an enthla a. An mi rinhlelhte hian an ip ah tlansanin Myanmar lamah an tlanchhia a. Ipah hian methamphetamine mum nuai 3, sing 3, sang 3 leh za thum (kg 37 leh gram 476 a rit an man a. Methamphetamine an man hi thubuai siamsak a, dan anga kalpui tur leh chhui zui turin Zokhawthar Police kuta hlan a ni.

